

四庫全書

史部

欽定四庫全書

史部

平定準噶爾方略續編卷十八至二十一

詳校官監察御史_臣孫家賢

通政使司副使_臣莫瞻菴覆勘

總校官進士_臣朱鈐

校對官修撰_臣戴衢亨

謄錄監生_臣蔣知廉

欽定四庫全書

平定準噶爾方略續編卷十八

乾隆二十七年八月壬辰

喀什噶爾辦事尚書永貴等疏奏暫停折給鹽菜餘糧

永貴等奏言上年六月臣舒赫德等遵

旨議奏各城盈餘糧石減價折給官兵鹽菜銀兩計九月十一月除折給官兵外仍餘糧二千九百

石有奇現在回人所餘糧石全行出糶糧價益賤較前僅十之三四若仍行折給徒滋糜費今秋收穫較前益豐糧價更減應請暫停折給其鹽菜銀兩仍以普爾錢文扣抵俟糧價適中時再行辦理奏入報

聞

己亥

命以原任主事富魁爲前鋒在本旗行走

上諭軍機大臣曰阿桂等奏原任主事富魁帶領匠作於固勒札格登山監造御製碑文事竝可否量予獎賞等語富魁前因獲罪留於軍營効力今既將固勒札格登山碑文俱監造妥協富魁著加恩授爲前鋒仍在本旗行走

葉爾羌辦事都統新柱等疏奏購買回人布疋事宜

新柱等奏言本年三月臣等請以葉爾羌庫貯

新錢購買回人布足運送伊犁換易哈薩克馬匹今計存貯錢文共六萬六千騰格以錢四十文買布一疋共布七千五百四十七疋通用新錢六千三十七騰格三十文俟和闐折收紡絲布足起運後續行運送臣等與衆伯克議自今年十月至來年九月勸課回人織布可得五萬餘足以庫貯餘錢購買則錢法既可流通而回人生計更有裨益臣等隨飭辦理糧餉之圖彙

阿等自十月起凡回人以布易錢者即照時價給發毋許伯克頭目等從中尅漏奏入報

聞

庚子

叅贊大臣阿桂疏奏伊犁城垣公署工竣

阿桂奏言臣等原議伊犁建造城垣公署因烏哈爾里克木植頗多即於該處度地興工派副將國柱領兵八百名專司版築上年八月先將

應用器具置辦齊全於二月二十五日起工計
四門周圍四里三分所有倉庫及駐劄大臣侍
衛官員公署兵丁營房共一千六百八十九間
於七月初八日告竣臣等節次查勘土木工程
尚屬堅固其閘勒奇河亦伐木成造橋梁前項
工程除奏明加給兵丁口糧外並未動用官項
無庸造冊請銷奮勉出力之千把總各一員請
行文陝甘督臣以應陞之缺補用効力行走千

把總各一員以應陞之缺與內地人員間補再
回人等在固勒札建造城垣與烏哈爾里克城
相倣所造房屋亦俱竣工謹一併繪圖恭呈

御覽奏入報

聞尋

欽定烏哈爾里克城曰緩定城東門曰仁熙南門曰
利渠西門曰義集北門曰寧漠固勒札城曰安
遠城東門曰景旭南門曰嘉會西門曰環瀛北

門曰歸極

壬寅

賜哈薩克阿布賚

勅書

皇帝勅諭哈薩克阿布賚爾遣使都勒特赫勒蘇爾
統前來進呈奏章懇請賜以璽書願世世子孫恪
守藩服若非老成明達樂善循理何以及此果能
常存此心朕必疊沛恩施永遠無斁爾所以矢恭

順之忱者要在約束所部守分安生但爾屬人等
往往恃大國寬容越境游牧我駐劄伊犁大臣等
慎固封疆自必嚴行驅逐朕雖欲加恩亦不能廢
法曲貸試思爾哈薩克等若非潛來塔爾巴噶台
等處我大臣等何嘗有領兵逐捕之舉爾當傳諭
全部俾共知朕意今命爾來使等隨駕木蘭觀團
加恩宴賚賜爾阿布賚蟒錦及各色緞疋綉綾器
什芽茶使人歸日爾其祇受又賜爾使人品級頂

帶孔雀翎衣物器什銀兩各有差爾所奏使人烏
默爾舊居伊犁今願安插該處往來行走已如所
請加恩授烏默爾爲乾清門侍衛准其暫歸挈眷
因將來遷移戶口別賞烏默爾及伊弟等路費銀
兩併諭爾知之特諭

議新疆帶運官茶事宜

陝甘總督楊應琚奏言查甘省庫貯官茶自乾
隆七年至今陳陳相因欽奉

諭旨令臣與司道等通盤核計俾公私俱益謹列款
議奏至新疆戶口日繁每歲應需茶封及作何
帶運亦會商各駐劄大臣據覆歲需官茶二萬
七百餘封但新疆遠近不一軍臺馬駝止於遞
送文報應推覓牲隻陸續運貯令官兵領買其
運費即於鹽菜銀兩內扣抵等語謹查新疆現
在茶價每封需銀二兩以外若領買官茶稍加
運費較之買自商人尚屬減省將來遇有換班

兵丁更可酌爲攜帶現在巴里坤哈密有官茶
六萬八千餘封應先行撥運行銷再由內地運
往奏入得

旨軍機大臣會同該部議奏尋議新疆歲需官茶一
款既據該督咨商各該駐劄大臣議以官兵領
買較之買自商人爲省於官兵有益其陸續撥
運并令官兵攜帶各事宜俱應如所奏辦理奏

入

上從之

丙午

命解送回人阿塔木和卓及其家口來京

上諭軍機大臣曰永慶等奏稱逆賊波羅泥都霍集
占族人阿塔木和卓現居烏什所屬之喀薩哈無
知回人等因伊爲和卓木近族俱來禮拜伊又將
所收糧石散給貧人以沽名譽若聽其留住於地
方無益請將阿塔木和卓及其家屬十三名口送

往哈密安插等語阿塔木和卓既係逆賊等近族
兄弟且非守分之人永慶所請辦理安插甚是但
哈密亦未便容留滋事著傳諭辦事道員三寶等
揀派幹員將阿塔木和卓及其家口加意照看解
送來京

庚戌

命新疆撤回滿洲兵取道闢展行走

上諭軍機大臣曰旌額里奏稱回城駐防撤回滿洲

兵若從烏魯木齊至巴里坤正屆草枯雪盛之時
不便行走請將烏魯木齊預備馬匹改送伊拉里
克以候抽換取道闢展等語從前撤回滿洲兵雖
有由烏魯木齊至巴里坤之議今旌額理既稱遇
雪難行而新柱等亦奏稱經過回地於官兵有益
著傳諭旌額理即如所奏撤回滿洲兵不必過烏
魯木齊將預備馬匹改送伊拉里克換給取道闢
展前至肅州并傳諭永貴新柱楊應琚知之

恩免屯田民人應還續借接濟官項

上諭軍機大臣曰旌額理等奏稱本年由內地資送屯田民人四百餘名到屯以後所有接濟口糧籽種俱係借給官項請分別定議俟伊等收穫有餘將應還錢糧與從前資送之項分年令其交納等語屯回民人從前所領官項自應照原議分年交納此次所借糧石既因伊等甫經耕墾全賴接濟且又被災傷若仍令償還恐有妨伊等生計著將

續借之口糧籽種等項加恩賞給以示體恤

甲寅

諭哈密辦事道員淑寶等查辦回人貿易物價

上諭軍機大臣曰淑寶等奏安集延回人前來貿易
內緞疋一項除原價及運費每疋增加銀二三錢
等語貿易緞疋俱由內地遠行運送自應準照原
價及運費酌量增加視其情願交易與否再爲通
融減售乃止議加銀二三錢此或經手之員售多

報少甚至將自置貨物開入官項冀獲羨餘行之
日久則貿易一事又爲貪吏傲倖之端不可不防
其漸著傳諭淑寶等留心稽查據實陳奏

諭都統侍郎公明瑞辦理安插烏默爾事宜

上諭軍機大臣曰昨哈薩克入覲使人有烏默爾者
進呈阿布賚奏章謂烏默爾情願移居伊犁伊代
爲陳情等語隨詢之烏默爾情願挈眷前來因命
伊在乾清門行走已勅諭阿布賚矣烏默爾又奏

稱伊約於來年三月自哈薩克起程請伊犁大臣等派員往彼帶領著傳諭明瑞揀選通哈薩克言語之厄魯特數人按期前往再據烏默爾奏伊自幼在伊犁生長心戀舊居此猶事之所有至云伊姊已爲阿布賚妻若果如此何必移居或伊等私計烏默爾居伊犁後哈薩克等設有越境游牧之事伊犁大臣派兵驅逐伊得先通信息亦未可定但此特懸揣之事如謂伊果能洩漏信息則從哈

薩克脫出之厄魯特甚多又豈能一一防範耶明
瑞知此惟留意體察不可稍著形迹

丙辰

議駐防屯田餘丁揀補額缺事宜

烏魯木齊辦事副都統旌額理等奏言烏魯木
齊額設駐防屯田兵四千名其挈眷前來者一
千八百有奇餘二千一百餘名原議俟換班時
令楊應琚揀選情願挈眷者派往臣等查挈眷

兵丁內有子弟者頗多遇有缺出現將伊等揀補若換班兵出缺亦揀補孳眷餘丁則本處增一兵即省內地辦送一兵之費請嗣後馬兵缺出以步兵揀補所遺之缺即於餘丁內補放其步兵原額缺出亦照例頂補奏入得

旨軍機大臣議奏尋議烏魯木齊定議駐兵四千名除情願回營孳眷兵丁外其餘暫准換班亦選內地孳眷兵丁充補誠以新疆駐兵四千合計

家口即有萬衆人丁繁庶於差操之暇亦可耕
墾謀生今旌額理所奏自屬通融籌辦但此等
換班兵丁若盡以現在餘丁充補既恐人數不
敷即勉強足額而戶口亦不能增益臣等酌議
烏魯木齊現有守候換班綠旗兵二千餘名應
定以十缺爲率此十缺之內先行儘補現在餘
丁二名俟內地辦送挈眷兵丁到時人數日多
每次遞增一倍按十缺之數由二名而四名六

名照例揀補至四千兵額屆滿所有缺出悉將
餘丁補用再次內地所派四千兵丁俱由額
缺內派往將來內地原額即無庸補缺庶調撥
簡便而兵力益歸實用奏入

上從之

戊午

諭駐劄回部大臣等酌定調補伯克之例

上諭軍機大臣曰永貴等奏稱伊沙噶伯克古爾班

和卓商伯克墨墨氏敏哈子伯克阿卜都拉五品
伯克伊斯邁勒密喇卜伯克巴巴和卓俱係奉旨
記名應陞人員若俱候本城缺出補用恐至壅滯
應請不拘何城缺出即按品調用等語陞補伯克
若不拘本地准其調用別城自屬疏通之法但伊
等內如阿奇木伊沙噶噶雜納齊等缺俱承辦要
務若照內地之例迴避調補則伊等無掣肘之虞
且奉調時尚不覺煩苦至小伯克等既無庸迴避

徒慮伊等得缺壅滯調用別城將來遷移之際動
需費用恐於伊等生計無益自應分別辦理著傳
諭各城駐劄大臣等嗣後補授伯克應按照品級
分別照例迴避及坐補本處額缺會商妥議具奏

九月辛酉

命各城駐劄大臣確勘各城回人地畝收成分數
上諭軍機大臣曰達桑阿奏稱玉古爾庫爾勒回人
等今歲屆陞科之期派員查勘收成分數據報玉

古爾大小麥俱已成熟共收穫八千一百餘石庫爾勒所種因蝗蝻傷損僅收三百餘石等語回人所種地畝俱資灌溉之利雖不虞旱澇而蟲鼠爲耗致成偏災亦所不免雖不必盡照內地蠲賑之例辦理而視其被災分數酌量減免伊等自感出望外且實與生計有裨此次庫爾勒回人等陞科伊始既被偏災其作何蠲免之處著速議具奏將來各城回人所種地畝有成災者著各該駐劄大

臣詳悉查勘收成分數定議辦理俾回衆咸知朕軫念新附之意即其中有捏報災傷希圖免賦者因此履畝確勘亦得杜其徼倖之端著傳諭永貴等知之

癸亥

命賞從哈薩克來投之厄魯特巴桑職銜銀幣

上諭軍機大臣曰阿桂等奏本年七月自哈薩克來投之厄魯特巴桑告稱伊係塔爾巴噶沁之人被

哈薩克搶掠曾在阿布勒比斯處因充使來京蒙
恩賞五品頂帶孔雀翎今願爲天朝臣僕將在哈
薩克所有之牲隻棄置與妻室來投等語厄魯特
巴桑棄其所有產業挈眷來投誠悃可嘉著賞銀
五十兩緞二端巴桑既經恩賞品級頂翎著歸入
厄魯特佐領下照原品給與職銜

叅贊大臣阿桂等疏奏辦理駐劄官兵馬匹事
宜

阿桂等奏言臣明瑞行抵烏魯木齊時派往伊犁官兵交鄂津曹瑛帶領臣明瑞領兵百餘名先期馳赴伊犁與臣阿桂辦理駐劄事宜續據鄂津等將健銳營及京兵送到應令與臣等駐劄處所相近以便時爲操練現在新造城垣俱有兵丁營房酌量分住伊等所騎馬匹係喀爾喀等由烏里雅蘇台解送巴里坤因係賠償官項未免肥瘠叅雜若官爲牧放恐不知愛惜倒

斃更多應仍令乘騎之兵丁等領回牧養以備
差操俟換班屆期即帶往肅州交收如倒斃逾
額再著落賠償又有扣抵駝隻之馬五百九十
餘匹亦多疲乏臣等議選出可以過冬之馬三
百餘匹留於官牧羣其餘二百八十餘匹應併
入牛羊內搭放官兵口糧奏入報

聞

乙丑

諭科卜多辦事副都統扎拉豐阿屯田種植事宜

上諭軍機大臣曰扎拉豐阿奏稱科卜多屯田約計
大小麥收穫在七分以上惟所種之粟因氣寒霜
早秀而不實等語都爾伯特人等在烏蘭古木耕
種烏梁海人等在布拉罕察罕托輝耕種俱獲豐
收科卜多相距不遠從前扎哈沁等亦曾開墾收
成尚好看來此次或播種稍遲或霜雪早降又或
土性不宜種粟著傳諭扎拉豐阿詳詢該處舊日

居人酌量辦理其青稞一種既係蒙古地方所宜
來年自當廣爲播種毋致失時

丁卯

議派喀爾喀等往科卜多屯田事宜

定邊左副將軍成袞扎布等奏言准扎拉豐阿
咨本年科卜多所收糧石除給與兵丁籽種外
所餘尚敷二百人籽種等語臣等議照原奏於
喀爾喀都爾伯特扎哈沁內按數派往請照屯

田綠旗兵例從烏里雅蘇台月支鹽菜銀九錢
米二斗四升九合令其隨便耕牧至上年所派
一百人農具多係舊時存貯殘缺者多請酌爲
換給并青稞籽粒於播種前送往奏入得

旨軍機大臣議奏尋議上年成衮扎布等奏派綠旗
兵一百名往科卜多屯田試有成效再酌量派
兵增墾但所議都爾伯特扎哈沁人等甫經安
插不便遷移惟扎薩克圖汗部落公品級扎薩

克阿喇卜坦屬人曾於扎卜堪耕種現在閑散
居住請派出二百名於科卜多附近卡倫內耕
牧以裨生計遇有差務輪班行走其月支鹽菜
口糧換給農具俱應如所奏辦理奏入

上從之

已已

命遷移之察哈爾等旗加意耕牧以裨生計

上諭軍機大臣曰阿桂明瑞等奏稱新經安插伊犁

之察哈爾厄魯特兵丁編設佐領給與孳息牲畜
仍先給口糧以資接濟等語此等察哈爾厄魯特
兵丁除牧養牲畜外尤當以耕種爲業今既遷移
安插自應代伊等籌畫生計所有新到各戶俱
令其實力開墾餘俱如所議行

叅贊大臣阿桂等疏奏收到葉爾羌布疋及酌
停喀什噶爾辦送事宜

阿桂等奏言葉爾羌送折交騰格布五千疋喀

什噶爾送布二千疋均以正賦所餘接濟回人
生計請嗣後哈薩克布魯特貿易及屯田兵丁
所需俱於此項動支以省內地運送之費又查
葉爾羌布每疋二丈計值銀四錢一二分其喀
什噶爾布價值略同而尺寸較短質薄色淺詢
係從回人採買非官爲監造者查伊犁存貯布
疋及葉爾羌所送甚多喀什噶爾既係採買又
較遜於葉爾羌所出請停其辦送奏入報

聞

庚午

以誤派嚮導官兵

訓飭烏魯木齊辦事副都統旌額理等

上諭軍機大臣曰和其衷奏稱派往喀什噶爾等處官兵自烏魯木齊起程有嚮導外委把總丁建業引路錯誤多行五站官兵口糧不足已派德文速辦前往接濟等語官兵嚮導宜派索倫厄魯特等

熟悉道路之人始免錯誤乃轉令綠旗兵丁前引以致馬匹疲乏口糧罄竭殊不可解著傳諭旌額理等令其明白回奏外委丁建業甚屬冒昧該處雖經懲責詞後遇應陞缺出不必列名以示儆戒喀什噶爾辦事尚書永貴等疏奏查禁軍器情形

永貴等奏言臣等欽奉

諭旨以布魯特等購買回城軍器向例曾否禁止查

喀什噶爾葉爾羌阿克蘇等城辦理情形不一
喀什噶爾與安集延接壤彼處產銅鐵硝磺以
遊獵爲生無藉回城軍器向來未曾禁止英噶
薩爾亦同葉爾羌與拔達克山博洛爾人等貿
易因本處軍器尚需購買是以例不外售臣等
仍照舊禁止和闐亦同阿克蘇烏什俱與喀什
噶爾葉爾羌一體安設卡倫而阿克蘇居各城
之中布魯特等往來甚少惟烏什與喀什噶爾

北邊布魯特相近又通阿克蘇故永慶等於卡
倫盤查攜帶軍器以現在情形具奏臣等公議
外藩歸誠日久雖不必顯著禁例但往來人等
購買軍器應令各阿奇木於卡倫執照內填寫
數目若私行交易及收買過多者酌量截留以
示節制奏入報

聞

辛未

葉爾羌辦事都統新柱等疏奏愛烏罕等處情形

新柱等奏言八月初五日士伯特拉達克汗策旺那木扎爾遣人致書臣等譯看其書云聞愛烏罕頭目愛哈默特沙恃強攻痕都期坦部落取扎納巴特城以阿奇木伯克守之自居拉固爾城又克什米爾部落舊頭目名塞克專愛哈默特沙令其往見不從遂遣人統衆數萬攻之

塞克專迎戰敗潰爲其下人執送愛哈默特沙
頗能體恤農商人等如古之尼西爾宛時羊虎
同居並不相害等語臣等復書獎其誠悃辦令
起程初六日拔達克山穆喇特伯克等前來貿
易告稱起程以前聞愛烏罕欲遣使入

覲貢馬已至拔達克山我等頭目素勒坦沙亦遣使
隨同入京奏入報

聞

叅贊大臣阿桂等疏奏定議孳生駝隻之例

阿桂等奏言上年烏里雅蘇台解到孳生駝隻
臣等查照甘省之例每駝二百隻應以牝駝一
百七十五隻牡駝二十五隻爲一羣每羣以千
總一員或把總一員爲牧長外委把總一員爲
副牧長所管兵丁九名仍派守備一員總管每
百隻五年合算准例斃四十隻逾額即行償補
此外仍有孳生駝四十隻照例議敘如再有孳

生自一隻至二十隻以上將總管及牧長正副各官定爲等第分別加級紀錄兵丁賞給銀兩孳生不及四十隻總管及牧長分別罰俸副牧長兵丁等責懲至六年合算每牝駝七隻留壯駝一隻其餘即出羣馴養以備使用有老弱者變價以孳生盈餘填補仍作爲正數以定賞罰此次承辦牧駝之厄魯特等官員既經給俸如有孳生缺少自應照例示罰其議敘加級紀錄

伊等既未通曉即折賞緞布其老弱駝隻伊犁
雖不能變價亦可折給官兵路費又厄魯特官
兵應比照綠旗辦理翼領與守備同佐領與千
把總同驍騎校及委員與外委把總同厄魯特
兵與綠旗同奏入

上從之

壬申

叅贊大臣阿桂等疏奏回人孳生牛隻事宜

阿桂等奏言據阿奇木公木薩呈稱伊犁屯田
回人按戶給馬一千二百五十匹每年准銷倒
斃三分補給馬三百七十五匹俱屯田用牛較
馬爲優請於孳生官牛內給回人等四百四十
隻四年內併孳生可得牛一千餘隻四年後又
可孳生三百餘隻請即以抵補給馬匹五年後
原牛一千隻即可永遠不動等語臣等查回人
屯田馬匹例需補給今既有孳生牛隻則五年

以後所有補給之項可免另用馬匹之費而以牛服耕於義亦合請將官牧之牛給與回人牝牛四百隻壯牛四十隻令其孳生四年內共應補倒斃馬一千五百匹以牛七百隻分作三年抵補五年後所需牲隻即以孳生牛隻抵補仍以牛一千隻爲限永遠不准倒斃奏入得

旨如所請行

丁丑

闡展辦事郎中德爾格疏奏回人承佃收成各數

德爾格奏言臣奏請闡展等處裁汰兵丁所餘屯田分給回人承佃十分取一今據闡展安插伯克伊敏和卓連木齊木安插伯克珈如拉又吐魯番回衆三處共種獲穀石一萬四千一百七十五石五斗應交官糧一千四百一十七石五斗五升查現存官糧尚有三萬七千七百三

十餘石其駐劄官兵口糧及應付往來人等歲需僅一千四百石又有額敏和卓及威魯堡遷移回人應交官糧每年可得四千四百五十餘石供支尚屬有餘前項存貯糧石自應及時出糶無庸停止奏入報

聞

甲申

諭定邊左副將軍成衮扎布等查禁烏梁海等竊取

外藩牲隻

上諭軍機大臣曰成衮扎布等奏准阿桂咨哈薩克
奈滿鄂拓克多羅特拜等稟稱聞得烏梁海等今
春過額爾齊斯驅哈薩克克勒鄂拓克之馬三百
餘匹隨追至渡口僅取回百餘匹因斥以此事既
與爾等無干且傳聞未實如果有之俟本人控告
再行查辦等語著傳諭成衮扎布車木楚克扎布
等轉交烏梁海總管察達克圖布慎等將有無此

等情節即行查明如實有其事則甚屬乖謬從前
哈薩克巴魯克巴圖爾搶掠烏梁海等朕特命納
旺往諭阿布賚始伏罪乞恩將所掠人口牲畜查
還今察達克等自當約束屬人俾不滋生事端乃
反竊取哈薩克馬匹致伊等得以有詞殊非體制
成衮扎布等即嚴行查禁具奏

命陞賞建造烏魯木齊城堡營房官員

烏魯木齊辦事副都統旌額理等奏言臣等會

同楊應琚將移駐烏魯木齊兵丁一千八百十
四名應建營房三千六百餘間於去年十月派
都司永海贖罪原任總兵官吳士勝領綠旗兵
五百名在烏魯木齊羅克倫一帶河畔伐木縛
葦陸續轉運由舊屯至昌吉屯一帶擇田多水
足之地定爲城堡八處計一處造房一千二百
間住兵六百名建城一座高一丈六尺圍三里
五分一處造房六百間住兵三百名建城一座

高一丈五尺圍二里七分餘六處各造房三百
間住兵一百五十名建堡一座高一丈一尺圍
一里七分又酌量添建官員公署一百四十一
間倉庫六十五間計官兵房屋俱於八月訖工
城堡尚有未完來年農隙亦可竣事奏入

上諭軍機大臣曰旌額理等奏烏魯木齊建造城署
營房派都司永海革職總兵官吳士勝等率領弁
兵督催奮勉等語永海著以應陞之缺即用吳士

勝以遊擊補用其千總把總十一人俱著酌量賞給以示鼓勵尋

欽定城名曰寧邊曰輯懷堡名曰宣仁曰懷義曰樂全曰寶昌曰惠徠曰屢豐

冬十月甲午

葉爾羌辦事都統新柱等疏奏議敘官兵轉運臺糧

新柱等奏言查自葉爾羌之愛濟特呼至阿克

蘇共設十四臺所有臺站官兵口糧馬牛芻豆
從前俱由葉爾羌馱載運往因水草平常駝隻
傷損僅可運至第五臺臣等酌定於第五臺設
倉一所令索倫佐領蒙庫圖爾督率兵丁將葉
爾羌河所造運船四隻陸續轉運收貯倉內再
行支放河水頗急消長無定而蒙庫圖爾辦理
三年並無遲延阻滯臣等酌賞兵丁回人等布
疋蒙庫圖爾現屆換班之期謹列爲一等應請

以陞缺即用奏入報

聞

己亥

命議敘巴里坤等處督辦屯田官員

上諭軍機大臣曰永寧等奏巴里坤奎素等處向來地氣較寒一切細糧均難成熟今屯田試種以來該遊擊王紹守備李執中叢天祝焦燦等均能盡心出力督率弁兵多方培溉是以初次試種小麥

收成已及五分其餘豌豆等項亦俱有收再革職
副將楊景達到屯効力三載並無貽悞等語王紹
等俱著交部議敘革職副將楊景達著加恩以都
司用

壬寅

諭烏魯木齊辦事副都統旌額理等移駐貿易地方
上諭軍機大臣曰旌額理等奏此次哈薩克帶來之
馬一千三百餘匹若仍令在城外貿易因安插人

數漸多恐有匪徒私買且天時稍旱請在羅克倫
河畔有水草處貿易等語所見甚是嗣後即照此
辦理若人數益多即以漸移往前路庶可以杜私
售於遠人暫時駐牧亦裨益

癸卯

上諭軍機大臣曰新柱等奏稱愛烏罕頭目愛哈默
特沙遣使和卓密爾罕入覲等語愛烏罕部落頗
大遣使來京加恩宴賚後自應派員護送仍另派

回人同往方爲妥協英噶薩爾阿奇木素勒坦和
卓從前曾至痕都斯坦等處又在拔達克山奮勉
行走著來京請訓再行派往仍傳諭永貴將召伊
入京情節詳悉曉示

命定疎脫新疆遣犯之例

上諭軍機大臣曰鄂寶奏稱拏獲逃犯六十七審明
正法押解之外委把總趙龍陳順等俱有應得之
罪已行文哈喇沙爾辦事大臣照例查辦等語六

十七以旗人正身自鬻爲奴犯竊發遣又中途脫逃情甚可惡著照鄂寶所奏即行正法嗣後有情罪與此相似者拏獲之日不必具奉候旨即行正法趙龍等雖止疎防無故縱情弊僅照尋常疎防之例不足示懲著從重定擬嗣後凡發遣回部人犯沿途疎脫除嚴行查拏外即將押解人員監禁一年內拏獲逃人再行釋放照例治罪如限滿不獲將正法之處請旨著爲令

U.S. AIR FORCE

11-1-1

平定準噶爾方略續編卷十八

欽定四庫全書

平定準噶爾方略續編卷十九

乾隆二十七年冬十月乙巳

命設總管伊犁等處將軍以領侍衛內大臣公明瑞
補授

上諭大學士曰伊犁為新疆都會現在駐兵屯田自
應設立將軍總管事務昨已簡用明瑞往膺其任
著授為總管伊犁等處將軍所有勅印旗牌該部

照例頒給

諭科卜多辦事叅贊大臣扎拉豐阿建造城垣事宜
上諭軍機大臣曰扎拉豐阿奏稱科卜多屯田需用
青稞籽種一百石尚可向蒙古游牧貿易之商民
等購買不須運送等語科卜多既有內地商民行
走將來生聚必繁今伊犁等處俱建造城堡若照
例興工甚屬有益科卜多所有舊城基址既稱地
形卑濕著傳諭扎拉豐阿伊現在安營於科卜多

之南哈勒巴山即於該處擇高燥之地計可容兵
民若干不必過為寬大派屯田綠旗兵從容興築
其如何辦理工程之處會同成衮扎布酌議具奏
諭伊犁將軍明瑞等以訪察烏梁海搶掠情形曉示

哈薩克

上諭軍機大臣曰成衮扎布奏稱阿桂等前奏烏梁
海搶掠哈薩克馬匹奉旨查詢即派侍衛明成同
烏梁海內大臣察達克至阿勒坦淖爾總管扎喇

那克處詳悉訪察俱稱哈薩克前經搶掠我等牲
隻什物俱蒙恩索還其所掠俄羅斯烏梁海宰桑
庫克新等之物並未給還是以伊等報復曾搶哈
薩克牧羣二次等語看來情形已自明晰著傳諭
明瑞遇哈薩克人等即以所訪緣由明白曉示若
哈薩克欲給還牧羣當向俄羅斯索取與內附之
烏梁海等無涉

己酉

諭定邊左副將軍成袞扎布等辦理烏梁海事宜

上諭軍機大臣曰成袞扎布奏搶掠哈薩克馬匹之
烏梁海庫克新係平定準噶爾後逃入俄羅斯者
據內大臣察達克云辦理伊等頗易但恐與俄羅
斯啟釁未敢擅便等語庫克新等假我烏梁海之
名搶掠哈薩克馬匹情甚可惡且伊等前曾歸附
後又隨郭勒卓輝等逃入俄羅斯理應問罪今察
達克等既願辦理甚屬妥協何必復生疑慮著傳

諭成衮扎布如察達克等果欲前往除擒獲為首人等送來軍營其餘俱給與伊等管轄所有俘獲即交伊分賞効力人衆事竣後朕仍加以賞賚但須慎選幹練之人前往辦理即將此曉示察達克等知之

庚戌

命駐防効力人員均照北路軍營之例辦理

上諭軍機大臣曰海明等奏稱此次換班官兵有健

銳營前鋒叅領納晉泰等六員係乾隆二十三年
隨征効力後又留駐防二年驍騎校布勒庫等十
二員亦効力五年請旨議叙以示鼓勵等語大功
告成凡換班官兵俱係駐防非出兵可比即有分
外出力人員特請議叙不過量拔一二以勵其餘
若概行保送則缺少人多亦與伊等無益此次所
奏尚係出兵人員納晉泰等六員著送部引見布
勒庫等十二員著以應陞之缺即用嗣後如專係

駐防人員俱照北路軍營之例辦理可傳諭駐劄厄魯特回部各大臣等知之

壬子

議給伊犁將軍

勅書開載職掌事宜

軍機大臣奏言欽奉

諭旨於伊犁設立將軍查各處駐防將軍其職掌大略相同惟新疆當戡定之初一切管轄地方調

遣官兵自應酌定成規臣等謹查伊犁為新疆
總匯之區既經設立將軍凡烏魯木齊巴里坤
所有滿洲索倫察哈爾綠旗官兵皆聽將軍總
統調遣至回部與伊犁相通自葉爾羌喀什噶
爾以至哈密等處駐劄官兵亦歸將軍兼管其
地方事務有各處駐劄大臣仍照舊例辦理再
葉爾羌喀什噶爾等回城皆在邊陲如有應調
伊犁官兵之處亦准各處大臣咨商將軍就近

調撥臣等擬開明職掌載入

勅書奏入

上從之

丁巳

以誤辦換班撤回官兵軍裝

訓飭喀什噶爾辦事尚書永貴等

上諭軍機大臣曰永貴等奏稱喀什噶爾換班撤回之健銳營官兵辦給馬駝帳房等件又整理弓矢

撤袋烏鎗火藥委副都統品級富虎帶領起程等語此等撤回官兵不過照常來京且道路久屬清靜並無嗎哈沁何必特行辦給軍裝撤回者既如此辦理則前往換班更當何如永貴此次所辦殊為不曉事理嗣後宜加酌量可傳諭知之

十一月辛酉

命設伊犁等處叅贊領隊大臣等

上諭大學士曰伊犁等處已授明瑞為將軍自應設

叅贊領隊大臣協同辦事伊犁叅贊大臣著愛隆
阿伊勒圖補授領隊大臣著五岱補授愛隆阿五
岱賞銀各一百兩馳驛前往伊勒圖亦由喀什噶
爾調赴伊犁所遺領隊副都統員缺著揚桑阿補
授協同永貴辦事

命議叙伊犁督辦屯田綠旗官員

上諭軍機大臣曰阿桂奏本年伊犁屯田綠營官員
所種禾苗為田鼠傷損較去年收成分數稍為歉

薄計一夫所獲尚有二十餘石等語屯田稍被災傷而收穫尚未甚歉薄所有承辦官員頗能勸課著加恩交部議叙

諭內大臣尚書都統阿桂等辦理哈薩克事宜

上諭軍機大臣曰阿桂明瑞奏稱哈薩克人等性本頑愚不可以理論今春將孥獲伊等頭目及所有牲畜給回伊等轉謂大皇帝矜憐我等不行治罪復來塔爾巴噶台山陰之哈爾巴哈等處游牧似

應示以兵威來春擬同領隊大臣二員分為三路
領兵前往驅逐多收其屬人牲隻釋放二三人令
致書阿布賚其牲隻竟不給還以示懲創等語哈
薩克等貪得無厭仍行越境游牧理應加以懲創
但自明瑞外領隊之伊勒圖鄂津伍彌泰等俱未
為諳練軍務今授愛隆阿伊勒圖為叅贊大臣五
岱為領隊大臣計伊等前抵伊犁已屆領兵驅逐
之期明瑞與愛隆阿五岱分路前往酌派伊勒圖

鄂津伍彌泰隨行學習此次重懲越境人等哈薩克所屬或生畏懼貿易者少或糾衆為匪以圖報復俱未可定然亦不得因此自生顧慮遂爾姑息從事至塔爾巴噶台等處雖未便即駐滿洲綠旗兵丁似應將厄魯特兵酌令駐劄防守著傳諭明瑞等將來驅逐哈薩克後作何移駐厄魯特兵丁之處會同妥議具奏

內大臣尚書都統阿桂等疏奏體訪烏默爾情

形

阿桂等奏言臣等遵

旨體訪哈薩克使人烏默爾因何願來伊犁居住緣
由隨令侍衛碩通訪問與烏默爾相識之厄魯
特等據稱烏默爾係厄魯特人伊父在噶爾丹
策零時曾唆使厄魯特等騷擾哈薩克與其部
衆有怨阿布賚因係伊妻弟恐被傷害特遣為
使等語臣等看阿布賚所奏與體訪情形相符

其請人往迎亦係求為護庇之意但哈薩克人等多疑若以為烏默爾復居伊犁恐效前此所為途間或加以侵掠亦有關係臣等議於來年三月內酌遣數人至邊界守候烏默爾令其帶回伊犁并乘阿布賚遣信之便先行札知奏入報

聞

乙丑

命新疆賁

貢員弁不得騷擾所過地方

上諭大學士曰新疆所進貢物經由各該省州縣境內行走住宿地方有司自當加意照料護送若應付不時致有褻越固非奉上之道如已照例供給全無玩悞而賁送人等轉有意藉端騷擾則斷不可蓋此等微末員弁罔識事體或不過以鵠鷹犬馬之類過事矜張於應給夫馬廩給之外多方需

索地方官因係貢物不敢與校而新疆貢獻歲以
為常設將來驛使踵轍為日正長滋累何所底止
此風斷不可長倘有此等滋擾之人該督撫等不
行據實叅奏一經察出決不稍為寬宥可速諭沿
途各督撫知之

命優卹病故之伊犁總兵官金梁以葉爾羌總兵官
汪騰龍接辦屯田貿易事務

上諭大學士曰金梁自補授總兵以來雖未著有戰

功而駐劄伊犁於一切屯田貿易事務辦理俱屬
黽勉今聞溘逝殊堪憫惜著加贈提督銜賞銀一
千兩料理喪事以示優卹並著楊應琚於伊子中
擇年長者一人送部引見候朕降旨加恩伊犁屯
田貿易諸事甚屬緊要著葉爾羌總兵官汪騰龍
速行接辦葉爾羌現有駐劄大臣可不須總兵官
駐劄著楊應琚於副將內揀選一員前往辦事

戊辰

命將賞查還搶掠霍罕馬匹之布魯特比沙巴圖等
上諭軍機大臣曰永貴等奏霍罕額爾德尼使人巴
巴什克稟稱伊處貿易人沙薩伊特有馬八十匹
為布魯特之薩魯部人掠去隨飭噶岱默特往查
其頭目沙巴圖聞信即盡行取出交還等語布魯
特等互相掠奪亦事之所有沙巴圖一聞查取之
信即行遵照辦理甚屬恭順著傳諭永貴等酌量
給賞以示鼓勵噶岱默特奉委查辦亦能實心奮

勉俱著一體賞賜

命酌定新疆市廛園圃租額

上諭軍機大臣曰旌額理等奏稱烏魯木齊挈眷屯田民人陸續前來其貿易人等亦接踵而至計開設市肆五百餘間開墾菜圃三百餘畝請酌量定額收租以充公用等語烏魯木齊安插兵民漸多貿易人等皆藉官地以謀生計理應稍收租價俾公費有餘即如所奏辦理至伊犁及葉爾羌等城

有似此者自當一體查辦著傳諭將軍大臣等將
各城商民所居酌定租額既有裨公用亦可就便
稽查約束至厄魯特回人向無此例不得藉端巧
取

辛未

喀什噶爾辦事尚書永貴等疏奏修築新城工
竣

永貴等奏言前因喀什噶爾舊城頗狹大臣官

兵等俱駐劄郊外經臣等奏請修築新城於本年四月初一日興工至八月告竣計四門周圍二里五分版築尚屬堅固九月又造成倉庫房屋七十八間所有官兵及錢糧軍裝俱遷移新城其舊城回人照舊居住至臣等辦事公署共四百餘間原有波羅泥都等入官房屋移至新城改建冬春之間亦可竣事其兵丁營房木料一時難以湊集據衆伯克等情願捐助木料三

百間甚為懇切臣等擬允其所請俟交收全完將稅款盈餘酌量賞給以示體卹奏入得

旨新城距舊城道里遠近及駐劄處所俱著繪圖呈覽

命停給回城換班兵丁駝隻

上諭軍機大臣曰永貴新柱等俱因換班兵丁帶來駝隻設法辦理永貴請留給本人加意收放新柱請分給臺站收放等語看來回地不宜駝隻從前

倒斃者頗多今又留該處牧放不數年間徒至傷損伊犁現在牧廠與駝隻相宜著傳諭永貴等將所有駝隻或今冬或來春草生時派兵緩行送往喀什噶爾葉爾羌俱距伊犁不遠若有需用亦無難調取再換班兵丁原非征戰可比嗣後不必給與駝隻著傳諭楊應琚照給與駝隻分例或驟頭車輛酌量辦給以資馱載

丙子

諭伊犁將軍明瑞等辦理哈薩克事宜

上諭軍機大臣曰昨明瑞等奏稱哈薩克復來塔爾巴噶台一帶游牧請於來春前往驅逐收其人口
牲畜業經降旨允行但近據旌額里等奏左部哈薩克努爾賚遣使入覲又有烏爾根齊城哈爾卜奇齊玉斯別部之巴圖爾亦遣使前來伊等因見右部哈薩克等入覲得霑恩賞故相率倣倣念其遠來歸附自必照例宴賚是來春正值伊等內向

之時忽聞收其游牧恐外藩愚頑轉生疑懼即遲至明年冬後年春再行驅逐亦無不可著傳諭明瑞等將收取牲畜之處暫停辦理仍照前次曉示逐回

甲申

諭定邊左副將軍成衮扎布等辦理烏梁海庫克新事宜

上諭軍機大臣曰扎拉豐阿奏稱烏梁海內大臣察

達克等自備資斧前往辦理庫克新伊亦領兵五十名前往偵探策應等語此次察達克辦理庫克新因庫克新原係伊部落人等逃入俄羅斯又指伊等名目為匪是以自請往辦原不藉扎拉豐阿之助乃伊復請自行領兵前往徒覺張皇於事無益著成袞扎布等速行傳諭停止

申諭喀什噶爾辦事尚書永貴等尋常貢物不必特派人員賫送

上諭軍機大臣曰永貴奏稱外藩所市鷹犬等物及
回人等貢獻者因為數頗多特交護軍叅領松年
由驛馳賫等語近因新疆賫送官物或有鷹犬之
類官兵等藉端騷擾曾降旨命督撫等查叅又軍
機大臣議嗣後新疆年貢仍由驛馳遞其隨時微
物如鷹犬之類俱於賫送金玉之便附來俱經准
行著傳諭永貴等此等尋常貢物不必多為購辦
或有需用候行文知會再為附便賫送不必特派

人員以致滋擾仍通諭各駐劄大臣知之

丁亥

諭定邊左副將軍成衮扎布等辦理哈薩克事宜

上諭軍機大臣曰成衮扎布等奏烏梁海散秩大臣
圖布慎之子伊蘓特在額爾齊斯河渡口見有兵
馬旗纛踪跡此處向係哈薩克行走之路恐因伊
等牧羣被烏梁海竊取或如巴魯特之計圖報復
亦未可定自當加意防範等語察達克等曾請自

行辦理烏梁海庫克新今既有此等踪跡當候信
息明確酌量行止昨扎拉豐阿奏請領兵策應察
達克等已諭令不必前往此次非專辦庫克新可
比著扎拉豐阿同察達克等前往於偵探策應之
處自可相資為用再成袞扎布奏伊犁撤回索倫
兵現在扎布堪過冬著傳諭成袞扎布有調用伊
等之處不過辦給馬匹亦屬便易但此事究係傳
聞仍俟查詢明確即行具奏

十二月辛卯

諭黑龍江將軍國多歡等查奏安插伯什阿噶什屬
人生計

上諭軍機大臣曰前因伯什阿噶什身故將伊弟達
瓦濟特子博東齊姪布魯特及所屬四十餘人移
往通肯呼裕爾安插今已數年未知伊等生計若
何著傳諭國多歡等查明奏具

壬辰

喀什噶爾辦事尚書永貴等疏奏酌定回人備
借倉穀事宜

永貴等奏言據公品級阿奇木噶岱默特等呈
衆伯克及屬人等願出穀一千石就城市村莊
附近收貯借給貧人嗣後每遇豐年請照此辦
理即交伯克等掌管設立檔冊以稽出入并懇
酌定章程以垂永久等語臣等伏覩我

皇上仁化感孚回人等亦知樂善好施之事既出自

公請毫無勒派而於貧人生計有益因量加獎
勸并酌定出納條例令其遵守奏入報

聞

丙申

諭葉爾羌辦事都統侍郎新柱等辦理呢雅斯伯克
事宜

上諭軍機大臣曰新柱等奏稱克什米爾之呢雅斯
伯克遣其頭目固爾班伯克賁進奏章據譯稱呢

雅斯伯克係喀什噶爾人在扎那巴特居住因亂
遷於克什米爾葉爾羌等各城回衆在彼者約四
五百戶俱願內向遷移呢雅斯伯克因率其頭目
入覲并欲取克什米爾以獻復書令其遠行入覲
再定取克什米爾之策又恐將來不取克什米爾
則伊心生悔懼請於入覲時將伊留京等語呢雅
斯伯克本係喀什噶爾之人懷土思遷原可聽其
自便至入覲之後作何辦理臨時自當指示若無

故拘留不遣即在厄魯特回部未定之先朕亦不肯出此如謂不允所請或有悔懼之心亦當留心察看俟其形跡顯露再行辦理豈有遽為逆億之理至新柱等以克什米爾路遙中隔土默特鞭長莫及且為愛烏罕愛哈默特沙所有伊現在歸附不必辦理所見尚是但業已不辦則書中所云俟入覲後再定語涉相欺亦屬失體今因爾班伯克既在葉爾羌守候著傳諭呢雅斯伯克許其入覲

候旨不必言及克什米爾之事俟呢雅斯伯克率衆來歸即為整裝入覲俟召見後再降諭旨

戊戌

諭喀什噶爾辦事尚書永貴等辦理霍罕拔達克山各事宜

上諭軍機大臣曰永貴等奏稱霍罕額爾德尼伯克遣使呈書叙述前後情事內如呼瓦特係呼什齊布魯特舊為喀什噶爾阿奇木後被額爾德尼殺

害伊弟納喇巴圖近日来投曾奏淮安插額爾德
尼若慮其造言離間情見乎辭又如鄂斯等處本
布魯特故地額爾德尼乃飾辭以為已有但書中
倘有給還之意已復書嚴飭遣托穆齊圖等往諭
若有抗拒情形即請備兵征討等語霍罕額爾德
尼伯克與布魯特雜處互相侵奪亦所時有伊自
內附以來尚屬恭順即所叙各情事亦未至關係
重大永貴等喻以情理自必遵行可以無須用兵

萬一必須用兵永貴亦祇可辦理軍務其領隊進
剿仍須愛隆阿五岱前往伊等業已派赴伊犁著
傳諭永貴等候額爾德尼回音相機辦理又

諭曰永貴等奏詢問從拔達克山來投之回人阿卜
都喇伊木等知波羅泥都妻子現隨摩羅巴喇特
摩羅密諾羅斯二人度日又據素勒坦和卓稟稱
素勒坦沙親信之密爾咱色得克與伊相好昨曾
致書通問擬於素勒坦和卓覆書之便作為己意

令密爾咱色得克開導素勒坦沙將波羅泥都妻
子送出若仍在遲疑即遣素勒坦和卓前往索取
等語此事前經新柱額敏和卓籌辦今所奏尚屬
可行但昨已命素勒坦和卓往愛烏罕辦事永貴
諒亦遣令前來俟到京請訓前往愛烏罕順道至
拔達克山索取波羅泥都妻子甚屬近便著傳諭
永貴等知之

庚子

命改鑄阿爾台烏梁海左右翼總管印信

上諭軍機大臣曰成衮扎布前經奏請鑄給烏梁海總管察達克等印信軍機處覆准頒行今成衮扎布請將阿爾台烏梁海等作為兩翼分管游牧著鑄給烏梁海左翼總管印一顆給與察達克其圖布慎係專管右翼亦著鑄給總管印信一顆所有察達克原領阿爾台烏梁海七旗總管之印即行繳銷

辛丑

申諭喀什噶爾辦事尚書永貴等嚴飭霍罕額爾德
尼伯克

上諭軍機大臣曰據永貴等奏霍罕額爾德尼伯克
所覆書札謂前遣使人奉有諭旨稱伊為汗且以
喀什噶爾嶺為界以此種種謬妄皆永貴等從前
給伊之書詞氣懦弱所致著傳諭永貴再行發書
嚴飭云向來寄爾之書俱稱伯克何得妄自稱汗

又何嘗奉有喀什噶爾嶺為界之旨爾意以大皇帝諭旨我等俱不得見豈知凡有關係外藩事宜俱傳諭我等知之何得妄行編造嗣後往來書札惟以恭順信實為主不可仍蹈故轍致取罪戾又書內所稱呼什齊們都斯人等在鄂斯地方掠奪九人什物其喀什噶爾五人之物已經索還惟霍罕四人什物馬匹並未給發請向布魯特索取等語是否確實併著查明具奏

乙巳

伊犁將軍明瑞等疏奏撥給烏魯木齊屯田牛隻

明瑞等奏言十一月十二日准旌額理等咨稱烏魯木齊屯田多以哈薩克馬匹耕作雖比牛較駛而性不相宜每致勞傷倒斃不若用牛之便今本處僅有牛六百餘隻因阿桂歸途之便相商據云伊犁有牛二千餘隻似可通融辦理

等語臣明瑞等查伊犁現有牛三千三十餘隻
除歸入孳生牧羣及老弱病廢外其餘一千九
百餘隻計以一千隻屯田尚餘九百餘隻於該
處屯田有並請俟來春雪消時派員加意牧放
解送無悞農時奏入報

聞

庚戌

命賞叅將馬虎副將職銜承辦伊犁屯田事務

上諭大學士曰楊應琚奏伊犁屯務現在需員辦理而陝甘總兵副將內熟諳田功者甚少惟西安城守營叅將馬虎曾於闢展等處屯田四載妥協幹練堪以派往等語馬虎著賞給副將職銜令於明歲帶領換班兵丁前赴伊犁承辦屯田事務其西安城守營叅將並著暫停開缺俟有陝甘副將缺出請旨補用

壬子

命布政使納世通往代尚書永貴

上諭軍機大臣曰永貴辦事日久著納世通前往更換現在納世通照看入覲回人前來俟來年帶領伊等各回本處後再往喀什噶爾更換永貴回京

癸丑

諭葉爾羌辦事都統新柱等辦理拔達克山事宜

上諭軍機大臣曰新柱等奏稱拔達克山素勒坦沙統衆搶掠博洛爾游牧圍困城池博洛爾沙瑚沙

默特情急求救已遣使將素勒坦沙嚴行斥責若
仍不肯止息即當領兵問罪留額敏和卓辦事等
語拔達克山博洛爾俱已歸順同為臣僕素勒坦
沙不知守分託言欲報舊仇博洛爾因而情急請
救若置之不問其何以服衆心如斥責不從自當
進勦但新柱向未歷練戎行額敏和卓頗悉回部
情事自當同往葉爾羌已有鄂對何必留伊辦事
即至拔達克山若必須用兵葉爾羌官兵甚少昨

已派愛隆阿五岱前往伊犁即於彼處派出滿洲
索倫察哈爾兵千餘名厄魯特兵數百名撥給馬
匹合之葉爾羌等處官兵以三千人為率始能集
事現在霍罕額爾德尼亦有占據額德格納游牧
之事當量其輕重緩急相機行止新柱額敏和卓
督辦軍務愛隆阿五岱領隊進剿其和衷商權妥
協辦理併傳諭明瑞永貴等知之

葉爾羌辦事都統新柱等疏奏遣使拔達克山

情形

新柱等奏言臣等遣伯克薩里等曉示素勒坦沙又將來使噶巴尼雅爾斥責遣使正在束裝奉到索取波羅泥都妻子

諭旨臣等因素勒坦沙有侵擾博洛爾一事嚴行斥責原欲其送出波羅泥都妻子以自贖臣額敏和卓又密行寄書令其悔罪獻俘但前項情事薩里等尚未深悉或素勒坦沙問及而伊等不

知則又徒勞往返臣等公議與其密為開導不
若顯行索取遂向薩里等及該來使詳悉曉示
并云收取波羅泥都妻子時須詳加辨驗以防
詐偽葉爾羌識波羅泥都妻子之人甚多若辨
驗不實則素勒坦沙之罪更重不能再邀寬免
該使叩首敬聽臣等始遣令起程奏入報

聞

烏魯木齊辦事副都統旌額里等疏奏撤回駐

劄昌吉副都統

旌額里等奏言查烏魯木齊屯田係陸續舉行而羅克倫昌吉又在其西是以駐劄領隊大臣今伊犁既建造城堡昌吉距烏魯木齊頗近所築城垣已駐劄安西提標又營移眷之兵其屯田事務即交該副將管理請將駐劄昌吉之副都統永瑞撤回烏魯木齊與臣等一同辦事奏入報

聞

甲寅

命移涼州莊浪滿洲兵及揀選索倫察哈爾餘丁駐防伊犁

上諭軍機大臣曰前因準夷未平涼州莊浪等處為西陲衝要故將西安駐防之滿洲蒙古漢軍兵丁派出數千名分地駐防今大功告成巴里坤以西皆成內地涼莊既非邊徼而該處並無行圍習藝

之所以致兵丁怠惰偷安俱歸無用現在伊犁建造城堡設立將軍駐防屯田與其三年一次派兵更番戍守何如即以涼莊兵丁挈眷遷移較為省便至內地之京口杭州等處亦不必多駐官兵從前漢軍人等原准其出旗撥補綠旗兵缺此二處兵丁亦應照例裁汰撥補將所出額缺分例揀選索倫察哈爾餘丁派往伊犁駐防庶糧餉不致虛糜而伊等得以及時效用差操得所為國家增一

勁旅著軍機大臣將涼州莊浪官兵作何挈眷遷移及裁汰京口杭州駐防揀選索倫察哈爾餘丁派往伊犁之處詳密定議具奏

乙卯

諭喀什噶爾辦事尚書永貴等辦理外藩事宜

上諭軍機大臣曰永貴等奏霍罕額爾德尼占據額德格納游牧若遷延不還勢須問罪今新柱等又有辦理拔達克山之舉應請將霍罕之事暫緩等

語所見尚是伊等駐劄之兵合計祇七八百名必須派調伊犁官兵方可集事但外藩彼此爭鬭亦事所常有馳書斥責自當遵奉指揮即其間未能全如約束而於大體不失亦可相機行止伊等惟遵照節次諭旨妥協辦理併傳諭新柱明瑞等知之

丁巳

愛烏罕使人卓密爾哈拔達克山使人阿卜

都里咱霍罕使人巴巴什克哈薩克烏爾根齊
部使人塞德克勒奇齊玉斯部使人烏克巴什
頗拉特回部喀什噶爾諸城三品阿奇木伯克
阿克伯克等入

覲恭值

上詣

太廟行祫祭禮於

午門前跪迎

聖駕

上御重華宮

召見

賜茶

賚冠服有差

欽定四庫全書

平定準爾方略續編
卷十九

二十一

平定準爾方略續編卷十九